

Date – 18/02/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoma chuan, Lengpui Airport chhehvel ram hralh chungchangah sorkar hmasa hma a lo lak tawh chu a diklo tih hrelo in, an lo hmalak tawh na ti danglamin a pulunga hralh lovin, hawhtir lease system in an kalpui a ni a ti.
2. Chief Minister Pu Lalduhomann tunhnaia Assembly petition commission thutlukna Speaker hnena thehluh a leak out chungchangah a thehluttu member chu Speaker nena tha taka an sawi tlang thei a nih chuan tihtawp tha a tih thu a sawi.
3. Opposition Leader Pu Lalchhandama Ralte chuan Mizoram Civil Service Combined Exam 2025 result lo chhuak enthat ngaia awm chuan Mizoram sorkar chu sorkar tha leh chak a ni tak tak em tih zawhna a siam tir a ti.
4. Prime Minister Narendra Modia chuan India AI Impact Summit New Delhi-a neih mek karlakah khawvel ram hruaitute a kawm.

<><><>

CM-LENGPUI AIRPORT

Chief Minister Pu Lalduhoma chuan, Lengpui Airport chhehvel ram Indian Air Force hnena leitir chungchangah MNF sorkarin hma a lo lak tawh chu a diklo tih hrelo in, an lo hmalak tawh na ti danglamin a pulunga hralh lovin, hawhtir lease system in an kalpui a ni a ti.

Vawiin sessiona Larsap thusawi cchungchang sawihonaah he thu hi sawiin House Leader chuan sorkar hmasa in hma an lo lak tawhna chu ring lo theilo a ni a, amaherawhchu preliminary notification awm hmaa rate an lo tifel hi a diklo an ti a, a pulunga hralh tur chu an ti tawp a, preliminary leh final notification hi an chhuah a, a ram man dawngtu leh a commission tu ten an dawn hi khawihah nge a kal tak ang tih chu CBI in a chhui dawn a, sessiona lo sawi a ngai lova, an chhui chhuak mai ang, ati.

<><><>

SESSION-OBITUARY

Mizoram Legislative Assembly fur thutkhawm ni 2na vawiin khan Minister hlui, Pu S.T. Rualyapa, leh MLA hlui, Pu K.L. Rochama te sun an ni.

Sunna hunah hian House Leader Pu Lalduhoma chuan ram hruaitu an sun tak pahnih te chu Mizoramin a ui takzet a, ram leh hnam tana an inpekna leh hna an lo thawhna te a ngaihlu in a chhuang takzet a ti a, thlamuang takin chawl se, an kalsan tak an chhungte'n he hun harsa an tawh mek lai hian Pathian thlamuanna leh awmpuina an dilpui tih a sawi a ni.

Oppostion Leader Pu Lalchhandama Ralte pawhin vawiina ram hruaitu hlui sun tak te chu Chhim lam atanga arsi lian pahnih, an nunah Pathian tihna lang tlat an ni a ti a, miten Politician te thudik tawk lo sawi fo, rintlak lo anga an chhuah mek lai pawha, an chenna veng leh kohhran kulpui, mite rin ngam, thudik sawi thin, mirethei hmangaihtu an tih pahnih an sun chu uiawm a tih thu sawiin, an kalsan tak an chhungte'n Pathian thlamuanna an chan a duhsak tih a sawi a ni.

Byte: Oppostion Leader Pu Lalchhandama Ralte

BJP MLA Dr K.Beichhua, Congress MLA Pu Ngunlianchunga leh MNF MLA Dr R.Lalthanliana te pawhin uina thu an sawi a, an sawi zawh hnuah Speaker Pu Lalbiakzama kaihhruaiin minute 1 chhung ngawi renga dingin an sun a ni.

<><><>

CM

Chief Minister Pu Lalduhomann tunhnaia Assembly petition commission thutlukna Speaker hnena thehluh a leak out chungchangah a thehluttu member chu Committee on Privileges hmaa din tir a duhsak lova, Speaker nena tha taka an sawi tlang thei a nih chuan tihtawp tha a tih thu a sawi.

Vawiin Assembly Session-a an sawihonaah, House Leader chuan tunhnaia petition commission thutlukna Speaker hnena thehluh leak out chungchang sawiin, hetiang hi an la hriat ngai loh thil a nih thu a sawi a, Assembly hnuaiiah committee hrang hrang a awm a, house-a a copy an pharh hma chuan confidential a ni a, sawi chhuah awih a ni lo a ti a, hei chen Assembly neih a nih chhungin member ten committee thuruk an sawi chhuah an la hre ngai lo a ti a, chanchinbu ah vawrh darh a ni chu pawin an tih thusawiin, tha tak a thehluh chu engmah pawin a awm lova, press conference ang hial kova chanchinbuah a chhung thu sawi zui a, action an la dawn tih sawi chu a vawikhatna thlenna a ni a ti a, Privilege Committee hmaa din tir than a nih avangin a hrehawm zia a hria a, a thehluttu member chu Privilege Committee hmaa din tir a duhsak lova, Speaker nena tha taka an sawi tlang thei a nih chuan tihtawp tha a tih thu sawiin, tha taka an sawi tlang thei lo a nih chuan Privilege Committee ah a kal zel a ngai maithei tih a sawi.

<><><>

ASSEMBLY -GINGER

Agriculture Minister Pu PC Vanlalruata'n nikum 2025 chhunga sawhthing leina cheng vaibelchhe 4-5 chingpen nia sawi chu sum pek chhuah a nih hma-a hum hman a ni a ti.

He thu hi vawiina Assembly Session zawhna leh chhanna hunah sawiin, Minister Pu PC Vanlalruata chuan sawhthing leina pawisa tih chingpen

chungchangah hian nikum July thla khan thil fel lo a awm tih an hria a, MAMB chuan Investigation Team dinin vawi 4 lai SCC hrang hrang leh an khaw tuamte tlawh chhuakin, Farkawn SCC, Khuangleng SCC, Cold Storage New Champhai SCC leh Ramhrangkawn SCC-a mi thenkhatin an sawhthing thar chhuah ni lo, hmun dang a mi, man tlawm zawka lei khawmin, SCC kaltlangin anmahni thar chhuah anga hralh an tum a, Portal-ah pawh an thun lut fel vek tawh tih an hre chhuak a, a taka sum tih chingpen a awm hmain investigation kalpui nghal niin, sum release a nih hma-a finfiah a ni a, data dik lo pawh siamthat a ni a ti. Sum chingpen tur pawh hum hman a ni tih sawiin, sum chingpen a awm hman loh avangin tu chungah mah action lak a ni lo tih sawiin, hemi chungchangah hian nimin thleng khan complain lut chin fel loh a la awm avangin thil sual tih tum nia hriatte hming tarlan hi ala rem rih lo tih a sawi bawk a ni.

Byte: Agriculture Minister Pu PC Vanlalruata

Agriculture Minister chuan tun thla February ni 2 atangin SCC 64 atanga sawhthing lei tan leh turin an buaipui mek a, SCC level-a sawhthing tender ve turin an in zirtir mek tih sawiin, Khuangleng SCC ah chuan sorkarin floor price a siam cheng 30 atanga cheng 35 inkarin an hralh chhuak mek a ti a, sorkar chuan sawhthing man to zawka hralh theih turin hma a la mek a ti a, kum 2024-25 chhung khan sorkarin sawhthing lei kaihnawih leh support price atan cheng vbc 1,41, nuai 16, sing 8, sang 4, 410 a seng a, sawhthing hralhna atangin cheng vbc 12, nuai 78, sang 7, 290 hmuh let a ni a, nikum 2025 chhung a sorkarin loneitu sawhthing leina bat sak a nei lo tih a tarlang a, zawh belhna chhangin Minister chuan hmarcha support price pek hun January chu a tlai hret tih an inpawm tih sawiin, kumin December thla atangin an pe tawh dawn tih a sawi bawk.

<><><>

OPPOSITION LEADER- MOTION

Opposition Leader Pu Lalchhandama Ralte chuan Mizoram Civil Service Combined Exam 2025 result lo chhuak enthat ngaia awm chuan Mizoram sorkar chu sorkar tha leh chak a ni tak tak em tih zawhna a siam tir a ti.

Nimin Assembly Session tan ni-a Larsap thusawi chungchanga motion of thanks vawiina an sawihonaah he thu hi sawiin Pu Lalchhandama Ralte chuan Larsap chu Mizoram sorkar hre chiang ber te zinga mi a nih angin, Mizoram sorkar chu hna thawk tha (efficient), mawhphurha la ngam (responsible & accountable) leh langtlang (transparent) tih a chhiar lai khan a thinlung takin a tui loh a rin thu a sawi a, Mizoram sorkar efficient loh zia chu Zoram thalaiten an hriatchian a ring a ti a, Mizoram Civil Service Combined Exam result lo chhuak enthat ngaia awm chuan efficient sorkar a ni em tih thalaite chhan atan a duh tih a sawi a, MPSC pawhin mipui rinna a hloh phah ang tih a hlauhthawn thu a sawi a ni.

ZPM sorkarin thil tam takah sorkar hmasa tih a nih thu leh an tih a nih loh thu sawi a, an mawhphurhna a nih loh thu an sawi fo thin leh kum 2023 December thlaa mipuiin thuneihna an pek atanga mawhphurhna an kovah an phur tawh tih ngaihtuah ngai lova, midang bel ching sorkar chu mawhphurhna la ngam sorkar a ni em tih zawhna a zawt a ti.

Langtlang sorkar tih chungchang pawh sawi zuiin, Cabinet meeting thu zep tlat a, puang tha duh lova, tunhnaia sawi hlawh em em, Lengpui Airport ram hralh chungchanga RTI zawhna chhanna pe tha duh lova, a zawtute CIC-ah an zualko

hnuah CIC-in DC a koh hnuah pek tur chin hrilh a, thuneitusang Chief Information Commissioner inrawlh ngai chu langtlang sorkar a ni ngai em tih zawhna a zawt bawk a ti a. Opposition Leader chuan House Leader-in ZPM sorkar tirha langtlang sorkar an nih tur thu leh tumah an enhran loh tur thu a sawi chu vawiin thlengin hmuh tur a awm lo tih sawiin, khawiah nge langtlang sorkar chu a awm tih zawhna a zawt bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ASSEMBLY- SOCIAL WELFARE

Social Welfare Minister Pi Lalrinpui'n ruang phurhna an ruahman hnuah ruang phurh nan cheng nuai 197, sing 7, sang 8, leh cheng 2 an seng tawh tih a sawi.

Vawiina Assembly Session zawhna leh chhanna huna, Hrangturzo bialtu MLA, Pu Lalmanpuia Punte zawhna chhangin, Minister Pi Lalrinpui chuan ruang 1, 888 phurh nan cheng nuai 197, sing 7, sang 8, leh cheng 2 an seng tawh a ti a, tunah process mek 74 a awm bawk tih sawiin, kumin January ni 25 khan online kaltlanga ruang phurh man lak theihna portal an hawng tawh tih a sawi a. Ruang phurhna atan tui kawng/speed boat hmanna bill phalsak a ni tawh a, ruang phurh kai man cheng sang 1 nih thu a sawi bawk a ni.

Hei bakah hian Minister chuan Tar Pension la tur inthun belh a har chhan chu zawhna chhanga sawiin, Ministry in ceiling a pek avangin mitthi an awm chauhin an in thun belh thei a ti a, a bak chu a dawngtu ngaiin an dawng reng thin tih sawiin, tun dinhmuna Ministry atanga Tar Pension- Old age benefeciary an pek zat chu sing 2, sang 4, 524 a ni a, hmeithai sang 2, 278, rualbanlo-722, onetime payment tia sawi thin BPL anmahni chhungkuaa eizawngtu ber an thih palh chuan vawikhatah cheng sing 2 an pe thin a, chungte chu mi 197, a zavaiin, sing 2 leh sang 7, 721 a ni tih a sawi bawk a ni.

<><><>

MPYCC

Congress Thalai chuan Aizawl Chawlhmmuna Chief Minister Pu Lalduhoma insak a hmunah vawiin khan an tlawh a,

A in sak mek hi Chief Minister fapa Ruata ta niin a inziak a ni an ti a, SBI hnuai UNNATI Scheme hnuai nikum 2025-ah loan an la niin sawi mahse thudiklo a ni an ti a, UNNATI hnuai subsidise dil hi mi 16 awm tawhin mi 3 approved tawh zingah Pu Lalduhoma fapa hming a tel lo a, dilna 4 hnawl a ni a, dilna lut thar a awm bawk an ti a. Pu Lalduhoma'n Bank in an lo pe anga a sawi hi thil dik lo a ni an ti.

UNNATI hi loan la ten an loan lak zatve an hmuh let leh theihna scheme a ni a. Mi pakhatin Crore 250 thleng an la thei a, Pu Lalduhoma'n loan awlsam taka lak theih anga sawia thalaite pawh ti ve tura a sawi hmuh hi thil ngaihthlak nuam tak niin lang mahse mi bik tan lo chuan tih ve mai mai theih a ni lo an ti a, hei hi Chief Minister thiam chan tuma insawi mamna maiah Congress thalai chuan an ngai an ti a ni.

Congress Thalai chuan Chief Minister la ni rei lo ber Pu Lalduhoman Mizoram Chief Minister lo ni tawh zawng zawng hausakna a khum thuai dawn niin an ngai tih an sawi bawk a ni.

<><><>

AI IMPACT SUMMIT

Union Minister for Information and Broadcasting, Ashwini Vaishnaw chuan WAVES Creators' Corner, Bharat Mandapam ah nimirin khan a hawng. Thusawiin Union Minister chuan WAVES Creators' Corner chu Ministry hmalakna pawimawh tak anih thu a sawi a. WAVES Creators' Corner hi WaveX, Waves Bazaar leh Create in India Challenge atan te a tnakai dawn hle a ni a ti.

<><><>

EC - RAJYA SABHA ELECTION

Election Commission chuan State 10 huamchhunga Rajya Sabha seat 37 ah inthlan buatsaih hun atan March ni 16 a ruat. Inthlanna turte hi Maharashtra ah seat 7, Tamil Nadu-ah seat 6, Bihar leh West Bengal ah seat 5 ve ve, Odisha ah seat 4, Assam ah seat 3, Telangana, Chhatisgarh leh Haryanaah seat 2 theuh leh Himachal Pradesh ah seat khat te a ni a. Inthlan hriattirna hi tun thla ni 26 ah tihchhuah a ni ang a, thlaleh March ni 5 thleng thehluh theih a ni ang.

Kumin April thlaa Rajya Sabha MP term tawp tur zingah hian Union Minister Ramnath Thakur leh Ramdas Athawale, Rajya Sabha Deputy Chairman Harivansh, NCP-SP leader Sharad Pawar, RLM leader Upendra Kushwaha, Congress leader Abhishek Manu Singhvi, AIADMK leader M Thambidurai, leh DMK leader Tiruchi Shiva

<><><>

PM

Prime Minister Narendra Modia chuan India AI Impact Summit New Delhi-a neih mek karlakah khawvel ram hruaitute a kawm. Pu Modia hian Spain President Pedro Sanchez nen Hyderabad House ah an inkawm a. Hruaitu Pahnihte hian India-Spain inkara thawhdunna pawimawhte an sawidun a. Heng zingah hian sumdawna leh eibar zawnnate, digital, innovation, hriselna, sik leh sa inthlak nasa siam that chungchang leh zirna lamte a tel a ni. PM Modia chuan India-EU inlaichinna kawngah Spain thlawpnaah lawmthu a sawi a ni. Vawiin vek khan Prime Minister Modia hian Finland Prime Minister Antti Petteri Orpo a kawm bawk a. Hruaitu pahnihte hian AI lama zirchianna kalpui te leh ram pahnih inkara thawhdunnaah India theihna tih chak zel an rel a ni. Pu Modia hian Serbia President Aleksandar Vucic nen an inkawm bawk a. Croatia PM Andrej Plenkovic a kawm bawk a. Estonia President Alar Karis, Bhutan PM Dasho Tshering Tobgay leh Kazakhstan Prime Minister Olzhas Bektenov te a kawm bawk a ni.

Pu Modia hian tukin vek khan Google CEO Sundar Pichai a kawm bawka ni.

<><><>